

La Grischelectra ha vendì pli pauc energia

La Grischelectra ha salvà ier saira sia radunonza generala a Cuira

DA MARTIN CABALZAR

■ **L'onn da gestiun 2012/2013 ha la Grischelectra SA vendì en cumparegliaziun cun l'onn precedent sis pertschient pli pauc energia sin il martgà che è daventà adina pli complex. Tuttina ha il maun public profità dal retgav da gestiun da la Grischelectra cun bunamain 4,6 milliuns.** Uschia ha il parsura dal cussegl administrativ da la Grischelectra, cusseglier dals chantuns *Stefan saira Engler*, pudì infurmar ils acziunaris ier a Cuira. La Grischelectra è ina interpresa d'electricità giuridicamain independenta. L'acziunariat vegn repartì en (acziunaris A) chantun Grischun, vischnancas grischunas, vischnancas concessiunaras, industria grischuna cun in grond adiever d'energia e la Viafier retica èn participadas cun 70 pertschient. Ils partenaris che cumpran l'energia; (acziunaris B) che secumponan da Repower

SA e l'Axpo Trading SA èn participads cun total 30 pertschient. La finamira da la Grischelectra che è vegnida fundada 1978 è tranter auter il niz da l'energia gratuita e da participaziun che stat a disposiziun a las vischnancas ed al chantun Grischun. La Repower è obligada da surpigliar ils quantums d'energia e da vender quella vinavant. Ella ha plinavant da surpigliar ils custs annuals da l'energia furnida ed ha d'indemnisar a las vischnancas ed al chantun la differenza da mintga ura kilowatt per l'energia messa a disposiziun.

En il decurs dals passa 35 onns d'existenza ha la Grischelectra purtà al chantun la summa considerabla da bunamain 76 milliuns, resp. la summa da bun 84 milliuns per chantun e vischnancas. Muntava la differenza da pretsch al cumenzament anc a 40 raps per ura kilowatt è quel creschì successivamain e munta dapi 2008/09 ad 80 raps.

Dal cussegl administrativ fan part *Stefan Engler* (Surava), *Kurt Bobst* (Poschiavo), *Georg Anton Buchli* (Versomi), *Hans-Peter Zehnder* (Illnau) e *Jon Domenic Parolini* (Scuol). En la gestiun sesan *Stefan Engler* (Surava), *Eugen Arpagaus* (Zezras), *Erich Büsser* (Sargans) e *Beat Ryffel* (Cuera).

6 pertschient pli pauc energia

Il quantum d'energia che è vegnida messa a disposiziun a la Grischelectra è sa reducì l'onn 2012/13 per 37.6 uras gigawatt (GWh) u per 6,2 pertschient sin 672,8 GWh. Ils custs annuals incl. la differenza restituida a las vischnancas ed al chantun muntan per l'onn da gestiun 2012/13 a 35,5 milliuns francs. Las indemnisaziuns da la cumpart dal retgav pajadas a las vischnancas concessiunaras da las Ovras d'Engiadina, a la vischnanca da Mesocco sco er al chantun per l'onn da gestiun 2012/13 muntan a flaiel 4,6

milliuns. L'onn precedent fuvà quai anc stà radund 4,9 milliuns. La differenza dal pretsch supplementar è restà era quest onn a 0.8 raps per kWh. Ils custs da produziun en la media èn creschids da 5.94 raps/kWh (2011/12) sin 6.19 raps/kWh. L'augment da 0.25 raps/kWh u da 4.2 pertschient èn d'attribuir al fatg che l'energia messa a disposiziun l'onn da gestiun 2012/13 è sa sminuida dapli che ils custs totals da l'energia da la Grischelectra SA. Ils custs da produziun da l'onn 2012/13 èn tuttina stads sut la media registrada dapi blers onns che munta a 6.62 raps(kWh).

Forza idraulica avant novs problems e novs sfidas

A la radunanza generala che ha gi lieu ier saira en la sala dal cussegl grond a Cuira ha il schef operativ da Repower *Kurt Bobst* referì davart il tema «Perspectivas da las ovras idraulicas grondas». Sin fundament da la situaziun actuala sin il martgà d'energia è la situaziun da las ovras idraulicas daventada blier pli difficila. Tenor sias expectoraziuns è ina adattaziun al design da la firma urgentamain necessaria.

En ses pled introductiv ha il parsura, cusseglier dals chantuns *Stefan Engler*, constatà che la forza idraulica sa chattia actualmain ed en il decurs dals proxims 10 onns en in temp ualti burascus. Damai che las surcapacitads, ils certificats da CO₂ che èn blier memia bunmartgà ed il sistem da promoziun da la Germania che na saja strusch d'influenzar da la Svizra anora, stettian las interpresas avant la gronda svida da s'adattar uschè spert ed uschè bain sco pussaivel a las pretensiuns dal martgà. Dumandads sajan dentant er ils acziunaris da las ovras partenarias che duaian giuditgar las schanzas da la forza idraulica era sut l'aspect da perspectives a pli lunga vista. La situaziun actuala saja bain difficila, ella portia dentant era la schanza da renovar las relaziuns tranter las vischnancas concessiunaras, il chantun ed ils partenaris.



Cusseglier dals chantuns *Stefan Engler* (a sanestra), l'actual parsura da la Grischelectra, declera che l'energia idraulica sa chattia actualmain en ina fasa difficila.